



AR C'HLEUZ ALAURET

HAC

AN TOUR DANTELEZET.



Var an ton gallec.

ER Finistèr e zoun bet ganet,
Ha Castel-Paol eo va mam-brô;
Ar vrô güella a ouffet cavet,
Ha caera Tour zo tro vardro.
Me o c'harie, me o admire,
Qenlies deiz ro Doue, me lavare :
Me gar va C'hleuz alaouret,
Va Zour dantelezet.

Mes, pa voe rentet din ar c'hêlou
E zoa ret quittäat va mestrez,
Ha mont da heuill an tabourinou,
Dilezel tad ha tieguez,
Me meus champet ha lavaret :
Oh ! n'antàn get, n'antàn get, n'antàn get...
Güell eo va C'hleuz alaouret,
Va Zour dantelezet.

Hac e vijen-me en em facher?

Senti d'an urz me a rànqe.
 Tud mechant a rê scouarn calet
 Oc'h va daëlou, va c'hlê mou-me,
 Hac e c'hoarzet, e voapaet,
 O lavaret : Yvonic? n'antàn qet!
 Adieu, va C'hleuz alaouret,
 Va Zour dantelezet.

En despet din-me, er rejimant,
 En exerciç, Yvonic paour!
 N'em boa na gout nac ententamant
 D'anaout james *droit*, *demi-tour*;
 Hac e trôen evel ma sônjen,
 Dre ma trôen, gant anqen e clasqen
 Güelet va C'hleuz alaouret,
 Va Zour dantelezet.

Diouc'h ar gamel tam ne brofiten,
 Treud, qen a güezen eus va za,
 O vont varlerc'h ar c'horf me chomme
 Bep cant pas d'en em discuiza;
 Hac e voelen, dre ma zônjen
 Marteze qen birvigen ne veljen,
 Siouas! va C'hleuz alaouret,
 Va Zour dantelezet!

» D'ar paotr-mâ n'eus nemet eur remed,
 (Eme'n doctor) : eur c'hônje mad;
 » Güelit-én.... entrezee ar vêred
 » E qerz ar c'heas paour timad. »
 Ha great e voe var ar guer-ze.
 « Dal da gônje; qea d'ar gear alesse,

» Da gaout da Gleuz alaouret,
» Da Dour dantelezet. »

O va brô gueaz ! ô brô beniguet !
Cetu me distro en ho creiz !!!...
Ra vezo da vigen milliguet
Ar re am c'hasfe deus va Breiz !
O va Zad paour ! ô va Mam guez !
O Jantonc, va anter-tieguess !
Gloar d'hor C'hleuziou alaouret !
D'hon Tour dantelezet !

Bremân cetu me em zieguess,
Gant Jantonc, va greguic coant ;
Eur vreguic douç, leun a vadelez ;
A ra pep tra hervez he c'hoant.
Beza hor bo bugaligou
A vezo coantic evel æligou.
O va C'hleuziou alaouret !
O Tour dantelezet !

Hac én zo boneur pâs d'am hini ?
Nan, m'en assur, a dra certen :
Ne meus mui aoun deus an enemi,
Hâ n'em bezo tanfoultr. biqen.
Neus general, na corporal,
A ell gûelet evel dôn-me ractal
Qer caër Cleuziou alaouret,
Na Tour dantelezet.

C'houi, soudardet eus va rejimant,
Qerzit oll d'ar victor atao ;

Pepini en deus e zantimant;
 M'en em gav gant Jantonic brao,
 C'houi a redo pell dre bep brô,
 Ha me chommo amân bete'r maro,
 Gant va C'hleuziou alaouret,
 Va Zour dantelezet.

Mes mar teuse bigen ar Zauzon
 Da attaqi va brô ger Breiz,
 Eleal neuze, en güir Breton,
 Me en tou amân var va feiz,
 Qerqent e ven güir tor e benn,
 Gant va Jantonic, bon daou o tifen
 Hor C'hleuziou ger alaouret,
 Hon Tour dantelezet.

Eun deiz; pa êruo an termen
 Ma vezo ret renta ar gont,
 Dirac treid ar Barner Souveren,
 Me gred n'em bezo get a spont;
 Me meus bepret an oll caret,
 Ha va Jantonic ha me admiret
 Hor C'hleuziou caer alaouret,
 Hon Tour dantelezet.

FIN.

A. LÉDAN.

CHANSON AR BONOMIC.

DEBONJOUR dèc'h, Jannedic,
 Bonjour dèc'h a lavaràn, bremàn;
 Bonjour dèc'h a laràn.
 Pelec'h e mán'r Bonomic,
 Pa ne mán o tommâ, bremàn?
 Pelèc'h e mán'r Bonomic,
 Pa ne mán o tommâ?

E mán duze el liors,
 Oc'h evessat an ed, me a gred,
 Oc'h evessat an ed.
 It-hu hardi d'e gavet,
 Ha n'ho refuso qet, me a gred;
 It-hu hardi d'e gavet,
 Ha n'ho refuso qet.

Debonjour dèc'h, Bonomic,
 Bonjour dèc'h a laràn, bremàn;
 Bonjour dèc'h a laràn :
 Cònje ho mere'h Jannedic
 Diganèc'h a c'houlennàn, bremàn;
 Cònje ho merc'h Jannedic,
 Da zemezi'r bloa-màn.

Eleal, va merc'h Janned
 Ne zemezo qet c'hoas, evit c'hoas;
 Ne zemezo qet c'hoas :
 Chom a rai'n daou pe dri bloas
 Da roul' an ebad c'hoas, evit c'hoas;
 Chom a rai'n daou pe dri bloas
 Da roul' an ebat c'hoas.

Bez' ho po qeuz, Bonomic,
 Beza va refuset, me a gred,
 Beza va refuset.
 C'houi deuyo d'he offr din-me,
 Mes n'he c'hemerin qet, me a gred;
 C'houi deuyo d'he offr din-me,
 Mes n'he c'hemerin qet.

Dalit ho sac'h, Cloareguig,
 Laqit-àn var ho scoa, ia da;
 Laqit-àn var ho scoa.
 Coulz eo d'ec'h en caout bremàn
 Evel en caout da vloa, ia da;
 Coulz eo d'ec'h en caout bremàn
 Evel en caout da vloa.

Neuze' c'ha'r C'hloarec yaouanq
 Da gavet Janned.... oh! oh! oh!...
 Da gavet Janned.... oh!...
 Eur poqic, va doucic coant,
 Ouzoc'h a c'houlennàn bremàn;
 Eur poqic, va doucic coant,

Ouzoc'h a c'houlennàn.

El leac'h eur poqic, va douç,
 C'houi pezo daou ha tri, ia, c'houi!
 C'houi pezo daou ha tri;
 Ha mallos d'ar goal dêodou
 Zo cos d'hon disparti, oh! ia, ni!
 Ha mallos d'ar goal dêodou
 Zo cos d'hon disparti.

Aben eun eiz de goude,
 Janned zo chommet clàn, ia, clàn!...
 Janned zo chommet clàn;
 Ma commañç ar Bonomic
 Dont d'en em chagrinàn : hàn! hàn!
 Ma commañç ar Bonomic
 Dont d'en em chagrinàn.

Neuze e za'r Bonomic,
 E za da fouetta brô, ho! ho!
 E za da fouetta brô,
 Da glasq ar C'hloarec yaouanq,
 Da guemer Janned, oh! oh! oh!
 Da glasq ar C'hloarec yaouanq,
 Da guemer Janned, oh!

Debonjour dêc'h, Cloareguic;
 Bonjour dêc'h a laràn, bremàn;
 Bonjour dêc'h a laràn :
 Aboue ma oc'h bet dumàn,
 Janned zo chommet clàn, oh! ia, clàn!

Aboue ma zoc'h bet dumàn,
Janned zo chommet clàn !

Laret'm boa d'ec'h, Bonomic,
Ho pije va c'hlasqet, hac abret;
Ho pije va c'hlasqet;
E teujec'h d'he offr din-me;
Mes n'he c'hemerjen qet, ne rin qet;
E teujec'h d'he offr din-me;
Mes n'he c'hemerìn qet.

Dalit ho sac'h, Bonomic,
Laqit-àn var ho scoa, oh ! ia da;
Laqit-àn var ho scoa :
Coulz eo d'ec'h en caout bremàn
Evel en caout da vloa, oh ! ia da;
Coulz eo d'ec'h en caout bremâ
Evel en caout da vloa.

FIN.

